

**Kerajaan yakin PLUS mampu selesaikan hutang - Tun Mahathir**  
**AstroAwani**  
**18 Januari 2020**  
**Rahimah Abdullah,**

KUALA LUMPUR: Perdana Menteri, Tun Dr Mahathir Mohamad yakin PLUS Malaysia Berhad (PLUS) mampu menyelesaikan hutang syarikat konsesi itu susulan keputusan kerajaan melanjutkan tempoh konsesi selama 20 tahun.

Jelasnya, PLUS juga sudah sedia maklum dengan syarat yang telah termaktub.

"Dengan lanjutan tempoh itu, kami yakin mereka (PLUS) mampu (membayar hutang). Sebab itulah mereka bersedia dengan syarat yang kerajaan tetapkan melalui Khazanah dan juga KWSP," katanya dalam sidang media selepas mempengerusikan Mesyuarat Majlis Pimpinan Tinggi (MPT) BERSATU di Yayasan Al-Bukhary di sini pada Jumaat.

Dr Mahathir dalam pada itu juga sedar dengan kemungkinan perubahan keputusan kerajaan semasa tempoh pelaksanaannya jika negara bertukar tangan.

"(Jika) orang yang berbeza mentadbir negara pada masa itu, mereka berhak membuat apa jua keputusan," katanya lagi.

Sebelum ini, kerajaan memutuskan untuk melaksanakan pengurangan 18% ke atas kadar tol bagi penggunaan kenderaan persendirian di semua lebuhraya PLUS, berkuat kuasa 1 Februari ini.

Sejajar dengan keputusan itu, kerajaan bersetuju melanjutkan tempoh konsesi bagi semua Lebuhraya PLUS selama 20 tahun, dari 2038 ke 2058.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/kerajaan-yakin-plus-mampu-selesaikan-hutang-tun-mahathir-228351>